



Faasnacht 2022

Y ha e chläine Muuni, dä lauft em Grosse hindedryy.
Är mäint, wenn er näbe m Grosse stoht, chönn är au e Grosse syy.
Dr Chläini isch schampar stolz, wenn dr Gross erklärt wie s lauft
Dr Grossi dä häisst Alain. Dr Chläi ha y Lukas tauft.

Im Stäärne spiile mir Quartet, daas finde mr megacool.
Am liebschte daas mit Fuessballclub, vo Züüri bis Istanbuul.
Bi äiner Froog zum FCB ha iich ganz fiechti Händ.
Y wäiss nüm isch Joggeli s Stadion oder isch s dr Präsident.

Us me alte Mäitröscher ha iich e neu Maschine bout.
Mit dere ruum y z Baasel uf, gäll das hätt sch mr nid zuetrou.
My Maschiine isch genial! Dä Helge zäigt e Foti.
Sy verschrottet im Minutetakt 10 Elektrotrotti.

In de Schuele häi sy hüt e richtigs Säichproblem.
Buebe oder Maitli-WC? Die Froog isch unbequem.
Myni Chüe mache käi Theater, y muess käi neu Hüsli chaufe.
Die mache s wie dr Bundesroot: Sy löie s äifach laufe.

Me sött dr Cortège verschiebe, zwee Möönet oder drei.
Am Beschte an Frauestreikdaag, denn het s äinewääg Polizei.
Dank deere Zämmearbet gäbt s dütlig weniger Speese.
Stell dr vor e Summercortège voll mit violette Chaise.

S Veterinäramt het mr gschriibe, y sell my drvoor hiete,
myni schöne, groosse Glogge de Freihäitstrychler z vermiete.
Sy häige uusegfunde, drum syg s wichtig, dass me mahn.
Uf de Glooge häigi s noch em Trychle Spuure vo Rinderwahn.

Dr Djokovic schimpft: 5G het my Handy voll krass Alte.
3G isch Rückschritt, Diktatur. Y wird my nid draa halte.
Är säit au: Nie 2G! Y loo me dr Freihäit nid lo nee!
Do dank iich für mii: Loos Schätzli, Schoofseggel het au 2G.

Ehe für alli isch erlaubt, är mit iim und sii mit iire.
Äs mit äs, au äs mit iim, Hochzyt vo Öpfel und Biire.
Und in zwöi Joor sy denn die mäischte längschstens wiider gschiide.
Do bii iich halt scho vill lieber: Bauer leedig — zfriide.

In Basel het jetzt d Hauptposcht zue. Jä sii, wär hät das glaubt,
dass me deere stolze Stadt im Zentrum d Poschtstell raubt.
Y mach dort e Heiri-Hoof mit Hühner, Chüe und Söi.
Vergäset s Baasel 1, jetzt sit dr s Buckte 2.

Churzarbet, Härtefallkredit, Wälle vier und Inflation.
Quarantääne, Arbetsloosi, volli Intensivstation.
Äs macht my müed. Y mag fascht nüm. D Hut wird langsam dünn.
Äis isch stabyyl, äis isch wie immer: D Credit Suisse macht Gwünn.

S git ganz e Huffe Rächt für d Tier. Chumm lueg Mol uf mym Hoof.
Y ha ghäizti Plätz für d Hühner, e Coiffeur für myni Schoof.
Wenn d Menscherächt für d Affe chömme, denn git s bald no vil meh
jungli Schimpansemännli in tiefergläite BMW.

Hüt muesch deklariere, wenn käini Organ wotsch spände.
S wäär schaad me würd die Ersatzteil äifach so verschwände.
Wenn Organ vo mir sötsch griege, denn foosch s «R» afo rolle.
Griegsch Organ vom Beat Jans, denn mäinsch au sygsch ganz e Tolle.

Y ha vor vier Joor uf em Vehmäart e junge Muni kauft.
Y hät nie dankt das dä spöoter komplet us em Rueder lauft.
Är isch bi de Freiheitstrychler, dort passt er aane sälle:
Jung und widerspänchtig wenig Gäischt aber grossi Schälle.

S Groosi schimpft: Dä Vincenz mit syne Stripper*inne.
Daas isch nüt Neus, dasch doch normal, solange y mii mag bsinne.
Immer wenn iich uf d Bank muess, s Gäld isch hüfig knapp,
ziehie miir die Halungge s letschte Hemmli ab.

Lgbtq+ isch für mii e alte Huet.
Leghenne, Gäns, Bäärner Sennehünd au Truthähn kenn y guet.
Quakfrösch het s bi miir im Täich und was blybt jetzt no zum Schluss?
Logisch dank dr Heiri, dä isch uf jeede Fall e Plus.

